

大清會典事例

卷三百八十五

欽定大清會典事例卷三百八十四

禮部

學校

幫補廩增

恩貢事宜

拔貢事宜

幫補廩增。○順治九年題准。幫補廩增。新舊相間。以考案為新。丁憂起復。病痊考復。停降考復。緣事辯復者為舊。無新儘舊。無舊儘新。新舊之間。總以考案先後為主。如第一是新。則先新後舊。第一是舊。則先舊後新。丁憂以下四項考居一二等。俱照名次先後為序。即起復亦不問服闋先後。惟考居三等。先儘丁憂起復。次病痊考

復。次停降考復。次緣事辯復。挨次序補。如起復等項。有一二人同時候補者。以文到日先後為序。文同到者。以原補廩增先後為序。若考後有起復准復者。序於與考之後。不得攙越。凡遇廩增缺出。該學教官於次日。即開明廩增某人。某月日某事故。見缺應補。上首補過某項某人。下首現有某項某人候缺。取具本生及上首下首各生不致攙越。賄囑結狀。加結申提調官覆勘無礙。申文詳奪。若該學留難不報。至三日以上。提調官遲至七日以上。吏皆究處。其增生補廩。

所遺增缺。俟前詳批允後。方許作缺呈詳頂補。不得兩項並申。如有朦朧攙越者。事發教官以贓論。本生黜革。保結生降罰。○又題准。廩膳緣事三月以上不結。停食餼。不作缺。事結供明。准補支。但經戒飭。即不犯革。亦備查拘發收復月日。俱作曠不補支。○雍正七年議准。舊廩考居一二等。方准與上等之增附挨次序補。其考居三等者。不准收復。○十年議准。四等廩生。仍依限送考。不許作缺。○又議准。嗣後舊廩考居三等者。仍准與新考上等間補。○乾隆六年議准。

貴州省廩增歲案幫補。向照各省以行文科考之日停止。至科案幫補。則於鄉試科冊解部之日停止。俟有缺出。歸下次歲案頂補。辦理未能畫一。嗣後黔省幫補廩增。應照各省例。歲案仍於行文科考之日停止。科考於下屆行文歲考之日停止。○二十四年議准。期喪不應考之廩生。餼糧照舊支給。毋庸扣缺。○二十六年議准。幫補廩增。向由州縣府轉詳。實屬具文。嗣後幫補廩生。由本學徑詳學政。覈明批補。仍將准補名姓日期。行知該府州縣註冊。以為關支餼糧。

及稽覈奏銷之據。其增生無關錢糧。專令學臣批准行學。毋庸轉行。以省案牘。○二十八年議准。附生考列二等補增。已邀嘉獎。若幫增之後。又即補廩。未免太優。應將新增補廩之例停止。○又覆准。廩生丁本生父母期年憂。例不出缺。其廩糧仍照舊支給。○三十八年議准。廩生報劣。照考列四等之例。停支廩糧。不作缺。仍照例察看。怙過不悛者。即行斥革。如果改悔自新。確有實據。仍於冊內開註改過字樣。俟報部覈准後。再行關支。○四十年覆准。廩生考劣。如果照

限赴考。文理較優。仍可量拔三等。其有限內送考而文理依舊疵謬者。毋庸降增。仍以停廩不作缺之處註冊。俟下次歲考照例辦理。○四十九年覆准。定例幫補廩增。新舊相間。惟考居三等。先儘丁憂起復。次病痊考復。次停降考復。次緣事辯復。挨次序補。至由別學改歸。作為虛廩。虛增。新舊間補。若考居三等。應專與丁憂起復者。挨次序補。○嘉慶八年覆准。湖南省通道縣考試。寄籍梁吳等十八姓。另編木字號。於通道縣學額內。占四分之一。其廩增亦照學額公配。

充補。○十年覆准。雲南省東川府學。原設廩增各八名。四年一貢。上年議准。額設廩增各二十名。二年一貢。應添補廩增各十二名。今據該學政以該學於上年九月接奉行知。前任歲考幫補業已停止。應參照乾隆二年山西省神池五寨等縣添設廩增分案添補之例。將前任科考優等生員合例補廩者。頂補六名。其餘六名。仍參照乾隆四年雲南省宣威州增設廩額。由貴州省威甯州撥歸幫補廩生之例。將本年歲考優等生員。與候廩生員。新舊間補。以昭平允。其

添補增生。即照此例辦理。至出貢年分。既據該學政查照普洱府二年一貢之例。與成例相符。亦即以嘉慶十年起貢。○十三年奏准。四川省向來學政考試。因各府有歲科並考之處。歲試事竣。均在五六月間。是以將歲案幫補。截至五月三十日。或六月三十日停止。而科案則以鄉試後十月初旬科冊報部之日為止。距下屆行文歲考之日尚遠。本於定例不符。且川省道途遙遠。所有夔州。甯遠。酉陽各府州屬。距省均一千數百餘里。及二千餘里不等。雖出缺在報部。

以前。而該處詳文到院。科冊業已報部。遂致不能幫補。是路近者可及期得補。而路遠者因後至見遺。又十月初旬科冊報部之期。各任亦無定准。嗣後該省歲科兩考。廩增幫補。各以年半為期。歲考之年正月初一日起。至次年六月三十日止。所出之缺。歸於歲案幫補。自七月初一日起。至第三年十二月三十日止。所出之缺。歸於科案幫補。遇有閏月在應補歲案期內。歲案幫補。即以六月十五日止。如在應補科案期內。科案幫補。即以七月十六日起。再查歲科考冊。

向例三年解部兩次。並不扣限。各省往往過於
遲延。嗣後各省學政於歲科考冊。均以試畢後
兩月出咨為限。其廩增冊。歲科兩試。亦令解冊
二次。均以截缺後兩月出咨為限。俾各屬幫補
均得辦齊報部。以便查覈。○又覆准。各省歲科
兩試幫補廩增。每多偏枯。解冊日期。亦過遲延。
先由四川學政咨請酌改章程。經本部具奏通
行在案。今湖北宜昌施南兩府。定例歲科連考。
三年內所出廩增各缺。歲科兩案輪補。辦理尚
屬平允。其廩增冊。隨歲科兩考報冊二次。每年

年底加報一次。解部日期亦不至於遲延。自可
仍照往屆辦理。○十四年議准。湖南省通道縣
學額。文武童生各八名。廩增各二十名。計該縣
廩增額缺。土著應得十五名。寄籍應得五名。應
將通道縣額設廩生二十名。俟土著補足十五
名後。土著出缺。以土著生員充補。寄籍出缺。以
寄籍生員充補。其增生出缺。亦照此例辦理。至
出貢事宜。無論土著寄籍。仍以補廩食餼先後
日期為序。○十六年議准。軍功議敘銓選生員。
有情願註銷銓選者。應准其註銷。仍留原銜頂

戴收入學冊。照常應歲科兩試。其原係廩增生者。作為候廩候增。照案新舊間補。○二十年覆准。嗣後選拔生。於會考出榜後。開除廩餼。其取准優生。亦照選拔之例。一律辦理。○又覆准。嗣後各省由廩增附報捐職官。及貢監等項。如未驗照之先。以接到咨文為出缺之日。如咨文未到。先行驗照。即以驗照為開缺之日。○道光九年覆准。定例實缺廩生。一經報劣。即行停支廩餼。其由增生附生報劣者。不得復行幫補。○又覆准。歲科兩考。廩增幫補。各以半年為限。如上

屆截止期內所出之缺。所取一等補完。二等增生。皆係新補。三等又無應補之人。所出廩缺。酌量變通。歸入新案幫補。○十二年覆准。附生丁降服憂。遇有廩增缺出。不准挨補。○十三年覆准。廣西省泗城鎮安兩府。向係歲科連考。本年有泗城府屬之西隆州廩生。應出上屆十年分歲貢。因病展限。至本年方行考准給單。所出廩缺。應歸科案頂補。其次應出十四年分歲貢之人。將來考准給單。所出廩缺。亦應科案挨補。惟向來考試該二府。均在歲案期內。本案歲試已

在科考期內。而該州歲案期內。未出廩缺。若將此兩貢所出之缺。統歸科案幫補。未免偏枯。應照歲科連考。三年內所出廩缺。歲科輪流間補之案。變通辦理。○十六年覆准。考列一等之增生。因病未能覆試。旋經招覆未到。應降附三等。撤銷增生。以附生註冊。其增缺仍照原出月日。照次挨補。○十七年覆准。增生報捐從九。無力赴選。情願註銷捐職。仍由生員應試。吏部准其註銷。自應收入學冊。以附生應試。未便仍還增生。○十九年奏准。嗣後增生補廩。所遺增缺。如

歲案所遺。歸歲案幫補。科案所遺。歸科案幫補。仍照定例。於前詳批准後。該學呈詳頂補。至廩生出缺。該學仍於三日內呈文詳補。學政查覈批准。如有延閣。即將學政教官一併議處。○二十年奏准。嗣後廩增出缺。應由該學呈報者。即於三日內具詳學政。應由學政飭知者。即於三日內劄行該學。務令隨空隨詳。隨詳隨補。於歲科兩試解部廩增冊內。註明某人出缺年月日。某人於某年月日頂補遺缺。查有逾限。即行叅處。○二十三年議准。各省駐防文生。向設有廩

增額缺。今既改應繙譯。應裁設廩增額缺。嗣後各省駐防弁兵子弟。已經補廩補增者。仍作為廩增生。俟出缺後。以次裁撤。不必頂補。○咸豐四年覆准。陝西省佛坪廳添設學校。其由洋縣撥歸佛坪之增生。下屆即以實增應試。考列一等之附生。考列二等之候廩生。即補佛坪廩缺。至候廩補缺後。出貢日期。准接算從前食餼年數。○七年覆准。議敘各項頂戴職銜之廩生。與議敘銓選實進官階者不同。准其仍留廩缺。其由軍功議敘銓選之廩生。不願註銷者。仍照議